

**TENLAIJA KOM  
(KAKOM) HEI  
LENTHOINA**

Doibom Tong

By:

Hmangte Serkhopao Kom  
Ichum Keirap Village

**Kom (kakom) zat heihi ralei chung a Doi leh ai kahmang thuhminga len hri: Doikungpu, Serlek, Thlenghrang, Rengam, Suvaipheinu, Bengpu, Maneithagnjar leh Rengbek jangnu hei ta lei ching Doitong kapo loma achang mak ravangah- inthoi in damna Doitong anta lei hmanga, ni phung nizat shunga hmit leh bengpho a in-en-na ajat ajat anta lei da-a Pathen doi naleh anma nileh an mani katlunga indoi na anta lei hmang doitong athlur pui hei rahming kha, ala ka hong sik teson tere hen nipu nipa hei lenpai inthluk na doi leh ai rahming tia, intheina, insena khan chu khang maro hei leise na leh leiom dan hei kha anhong manhret man chen sik madu jar-rah, kapu kapa hei ja in phut kalei manhret seng kha ka hei sun na ka hei phong ka-e. Katha jo; kakip jo tia ka hei phong changmak. Athat mak leh adik mak na manhret manchen nasik a ka hei phong jok ka-e.**

**Hiva thuhming kalei lo na thempu hei kha chu athoi ja hei hi ka-e:**

1. Late. Pu. Nokler. Hmangte - Khothempu.
2. Late, Pu. Sonjatong Leivon - Thempu.
3. Late, Pu. Chungneilun. Telien - Thempu.
4. Late, Pu. Tongjakai. Lumpheng - Thempu.
5. Late, Pu. Lunjachung. Hmangte - Thempu.

## **ABUK HEI KHA:-**

- (1) Akana thoi na (Mandamna) Doitong.
- (2) Mithana,Rethana (Mibumna)Doitong.
- (3) Nuhngak Rether indutheina(Jordei ai).
- (4) Mithlim na Rethlimna Doitong.
- (5) Sarathla, shang rathla bekna doitong.
- (6) Hmit Pher Doi.(Aihmitjing doi).
- (7) Thlasana Doitong.
- (8) Vok hlim Doitong.
- (9) Phit na Doi tong.

## **ABAK:-**

Akana thoina (Mandam na Doitong hei kha athoi ja hei hi ka-e.

- (1)Manupui thoina (2)Tuipui thoina, (3)Marilim manson.
- (4)Hleitui thoina (5)Hleithoi na (6)Daiphuna.(7)Ram shang thoi na.
- (8) Rampui thoina. (9) kholai hri thoinana.(10)Tuisi hlut na.
- (11)Rabungthing phurna (12)Shunghrithoina. (13)Ruto thoina.
- (14)Doisethoina. (15)Thlanhlam thoina. (16) Innlam thoina
- (17) Kalenlangthoina (18) Thisen khamna.

(19)Saru ngaru inhak tuiman in na.

(20)Kasha chopui kamukna.(21)Sakbang hlon. (22) Samakhavang thoina. (23) Khopui kham. (24)Ramtai thoi na. (25)Thing kakar na. (26) Vakahring masona. (27) Sorsam thoina (28)Thi-ing man cham. (29) Pukhneng na. (30) Lukhing nat damna.

### **Mithana (Mibumna) Doitong:**

(1)Kamtang Doi. (2)Rethlim nadoi. (3)Tharan tong doi.

(4)Ramsathlim nadoi. (5) Hmai ok doi. (6) Savun vanga mibum.

(7)Thepui vanga kap nadoi. (8)Kheng sum doi. (9)Theikhum doi.

### **Nuhngak Rether indutheina jordei ai Doitong:-**

(1)Jordei Ai (2) Ningdei ai, (3) Ning mak ai (4) Lung mok ai

### **Mithlim na (Rethlim na) Doitong:-**

(1)Mithlim na Doi, (2) Rethlim na Doi (3) Sathlim na Doi.

(4) Rechaam Doi

### **Rathla bek na Doi Tong:-**

(1) Sarathla bek na Doi (2) Shang rathla bek na Doi.

(3) Mirathla bek na Doi.

### **Hmit fe Doi:-**

(1)Aihmitzing Doi, (2) hmeiphum hlung (Silai ru)fena Doi leh

(3) The-leh- shai fena Doi

## **Thla san Doitong:-**

- (1) Arkevanga thlasan Doi.(2) Artui vanga thlasan Doi.
- (3) Umpui her vanga thlasan Doi.(4)Ai vanga thlasan Doi.
- (5) Rahmanga thlasan Doi.

## **Vokhlim na Doitong:-**

- (1) Thelesai Vokhlim na Doi.(2) inn leh hlei vok hlim na Doi.
- (3) Nuhmei pase vok hlim na Doi.(4)Ram le tui vok hlim na.

## **Phit na Doitong:-**

- (1)Nuhngak le Rether sanghram ka chang sik phit na-Doi.
- (2)Salu phit na Doi (3) Ponther phitna Doi.

## **Anat damna sik a anthoi najar**

### **Doitong Buk khat na:-**

#### **(1) Mannupui thoi na jar:**

Ahmangna manhret na, Mipui manu, kasin manu, kalen manu, khosung manu, ramshung manu, savang manu, inchong manu, heija inphut akana kha adam nasik a thempu'n, uisen, ui kum katlung ahmanga, kahre thing hei akana pa inn kimvea, aphun na kang jam hrui ankhoi, ahar vethum vang aman kei ja, uihrak a-at a, athisen kha akana pa khan, Aitui leh ain sik ka-e.

## **(2) Tuipui thoina:-**

Tuipui chung a ka-om hri leh rai kathamak hen anta man nat mipa kha Thempu inkhat in Arbang, akhong achang mak leh ke vang, tuipui panga khan ren hrak kha anta at a apek raho kasok: akut, ake, ahmur, akari hei kha hnachang chung a, robongte vang ju leh ada sik ka-e.

## **(3) Marilim manson:-**

Tuipanga khan jamdi buhlom sik a anso kapo vangkhan, ripui lim anta semma Aieng leh hmei ra-e vang aje anta sem ma, hnachang jeek katha neng vang thempu pakhan tui shunga amanson man hlut sik kae. Hivahi mari tatlo hei thoina ka-e, anti.

## **(4) Hleitui ja thoi na:-**

Thempu pan hlei lai ja kasok tuisi hnar rakan Arbang vang uireengpi leh tui reengpu akamuk hei ja aring aten na amathla, ahmor,akepar, khan akari hei seng hna chang chung a ada pek sik kae. Hiva hi ahlei lai ja hlei tui jin amannat hei thoi na ka-e anti.

## **(5) Hlei thoina:-**

Hlei lai ja kahmong anshe hleina shanglebe konim shanghma khan chu hmai le be kara hei athat thei na sik a Thempu inkhat in ai asuk mandi dak a atui kha ram solhu bo vang hlei lai ja aka thek sik ka-e hin nahin vaju leh leithor inti khan feivei jum aka jao sik kae.

**(6) Daiphunna:-** Ram an vat so leh thla khat pam anphoi so, phat leh hlei kha anro ri achang jar-rah hiva hmei pui takang hlon renhring, thingkung khan chu rathla Ravai hmit kacho keka tlek korkaset aom

min num tute hnuk anat mak na sik a artui inkhat vang thempu pan hna changbo vang tui khur asyem a tong le hla leh aka lum rakip aman dai ka-e. hlei laitim tak a atlo a akakur er sik ka-e.

**(7) Ramshang thoina:-**

Ram kar-ra ka-om rathla nai pang hen tu mo khat enga anta tlo a anta hei man nat ka-e tia thempu inkhat in, Nakthlam bo Belangbo Ramshangbo leh malongbo ahmang a arte inkhat vang hme so a avathoi sik ka-e anti.

**(8) Rampuithoina:-**

Ramkar-ra ka-om rathla upa hen ramkase mi tumo khat kha anta hei vok mashuk jarra akana ka-e tia thempu inkhat in Arkhong mo, Ui mo, vok mo inkhat vang ropui vanga ansyem tungko pheiko Ramshang, Nakthlam, Belang ahmanga hme so a athoi sik ka-e. Ahmur, akut ake, ashung alai leh ju kha mai cham chungka khan ada sik ka-e anti.

**(9) Kholaihri thoina:-**

Kholai shunga ka-om kholai ja hri hei khan mihei tasak ta-in an e arok jar-rah, akasa hei von kha anta mannat ka-e inti. Thempu inkhat in sakangpok leh arte vang athoi ka-e anti.

**(10) Tuishi hlut na:-**

Hlei lai ja tuishi aom jonchu eiman nat mak roh ti na: matlak se som leh langber vang, thempu inkhat in tuishi kha hlut ka-e.

**(11) Rabungthing phur na:-** Hlei lai ae mak leh hnomke a rabung thing akek jon chu, thempu inkhat in, ui kum katlung ahmang. Akaphur

tor sik pase kahrat athloi ja aphur sik ka-e. Ajar chu rathla hei omna thing achang jar-ra mihringdam thei mak anti.

**(12) Shunghrithoina:-**

Mi inkhat ashungin amaher thak jon chu shung hri aravei jo tia inlo. khava jar ra,thempu inkhat in arte inkhat a-omm ting a-aat tenna amalung tak a-at masuk in chu in ranga ka-dam sik tia athi kha anat nalai akahno-a achem kha kot khar thoi ja ada sik ka-e anti.

**(13) Rutothoi na:-**Ru katlek a-om inchu, thempu pakhan, Ardum inkhat a ruto a athoi sik ka-e. Arthi kha atlek na hmun tak a khan rahnak a aka no sik ka-e anti.

**(14) Doisethopi na:-**

Doisea kana inti hi mi natngai ka-e mak hei kha ka-e. Doise leh hrangkun inti hi okpa mihei ka-e antia thlalir ning thla so kot a, ardum leh arpui dum ratui vang anthoi hei. Tute man hmu mak hei anti.

**(15) Thlanhlam thoina:-**

Mikathi kha akahring hei kar-ra inkhat in alungset rei jar-rah arangei rei jar-rah, mikathi khan arathla kha athoi pek ka-e anti. Arathla, kathi ramma inphut ae mak leh thlankhur shunga inphut akabe sot sik a, thempu inkhat in arbangte inkhat ahnar avit a, khur akhor-ra, khur shunga inphut ahlet asyem ma, ahlet ting khan ar kha pat hruivang khan ahong kei sot a, arte kha chang kuii vang khan apat hruivang ahnarvang ama khei ja, chap chap atia athi hmaseng ankhei sik kae. khava arte rasa khan, mikathi kajui mi kahring rathla kha abek male ka-e anti.



**(16) Innlanga inthoina:-**

Inn shunga ka-om pathen kha amalung adam mak jarrah innshung mi ahuk mak jo me ka-e ti jar-ra, thempu inkhat in vok vang inranga inthoi na atlo ka-e anti..

**(17) Kalenlanga inthoina (Mandamna Doi):-**

Khosung leh ramshung ka-en sui pa kha amalung akatlai mak jo kae sik tijar-ra, thempu inkhat in setak or sehrat vang athoi hei ka-e inti.

**(18) Thisen khamna:-**

Tu mo inkhat hrei leh chem vang anton joa, athisen ankham thei mak jon chu, thempu inkhat in arhmedi annem neng amancham ma thisen akhaam sik ka-e anti.

**(19) Tui man in;-**Tu mo inkhat saru mo ngaru mo anhak a, aka-re a aomthang jon chu, atong inhret thempu inkhat in makhea tui doitong amancham ma aman in sik ka-e anti.

**(20) Kasa kamukna:-**

Inn shung mi dam thei nasik leh haothei nasik a, kum khat shunga vok inkhat antha-a, innshung hme tiah mihlop in sathei lo kae. Akheng a kaso kunga thurbem shunga andapet. Akakhok pen kha-sacheru kha ka-e.zing karting katlung ansak sotor mak inchu thempu pan sakbang seng kha kase kunga khan khur acho-a avum ka-e anti.

**(21) Sakbang Hlon:-**

Hai rakip a sak le inna, sakbang anhlei hei, sak thei mak heikha, Thempu inkhat in vangah achoi ja, “Hi va thlai insak na ae karok rakip

in hi sajo ruh. Kansung kanlai ja intang thei mak tin chei” tia ava hlon ka-e anti.

**(22) Samakha vangthoi na:-**

Mi inkhat adon avai lo-a, aru anat a anthling jo inchhu, upa nat antia ama kha, ui vang thempu inkhat in athoi sik ka-e anti.

**(23) Khopui kham:-**

Khoshung pumpui sik a kum khat sunga khopui khaam intlo. Hiva ninghin, hmeso kha kahre toi aler-ra abo ka-om inphunna, shongkung kha kaangjam hrui ahar inkhoi vang, katha tak a inpher tlit a ka-e.

Khothempu hlam kei na, Aitui thingsa phu hok leh ansu indi kha tui leh manhei ja rether hen inkir-inkak a kahre bo vang aitui kha ankathek a ‘hoi-e- hoi’ antia ka cho hei anjemma khoshung dunglevai ja thempu pa khan, ui kakei rether heileh inthoi hei jah, ui kha anman penga kho anchon sopet phat a, hme soting kase thanghei ja hmeso antlung leh ui kha antha a ahrap an sor-ra songkung vei le changa khan ahrap hei kha anbanga niranga sunga kho shunga tute man hlut mak hei. Hlam loi (hlampe) ansat a, tute khosunga hlut mak hei. Niranga tluk ning kholei shong mahlang nasik a ram sa anhong. Ram sakalen antha tor man chu, saluuk, sangar vang katlung anmahlang inti.

Khopui kham kholei jahin tuten hmei manvar jamak, hmei hei kha thapet sik ka-e. zingkar achang pha leh savangpa inn na khan upa rakip antup hei ja sanvam anta kei ja khava hmeither kha kho sara rakip in antan losik ka-e. Khava ning janna khan, arkhong um khong jamak. Arkhong rakip an hmur anta khop pekpet sik ka-e. Tumo khat in akhop

athat mak a, ama arkha akhong jon chu, jube bekkhat vang aka hlei sik ka-e anti.

**(24) Ramtai thoina:-**

Mi inkhat manhret lo thei lo-a avon rahnak a anat jon chu ram tai ka-e antia thempu in khat in haileng shunga tui dai alok a, athoi ja hmeila vang ahong ro-a arasa asok inchu kadam sik anti, tak asok in num asok mak innum atui kha anman in sik ka-e anti.

**(25) Thingka kar na doitong:-**

Thingsaiphi taman nathei kha, Ar inkhat vang Thempun athing kha apum ma aka-kar-ra athasik kae anti.

(26) Vakahring maso ti chu akanapa damna sik ah hme so ah arte inkhat thempun ama so ka-e anti.

**(27) Sorsam thoi na:-**

Sorsam intihi apha achang lo-a arathlen mat mat ati a aratha an nok ka-e. Hivahi tui intheng man in na, herkhat vang akathek thlon sik ,khan thi-ing tlang khat man sak sik ka-e anti.

**(28) Thi-ing man cham:-**

Natjat rakip sik ah Thempu hen thi-ing an mancham thei khavathi-ing kha akanapan an no sik ka-e anti.

**(29) Puk nat intihi tun lai ja Titanas inti kapo ka-e:-**

Pukk hnengsot nahi chu chem kangei tak chempek leh puk hlei vang anhnenga ka-e anti.

(30)Lukhing nat chu serkhu tim anat nalangting anton na maji thing kung chung a hem man hlut aka hnung en lo-a ahei da hlon sik ka-e anti.

## Mithana mibum oi Tong

### (1)Kamtangdoi:-

Man tongthei na doi tong ka-e anti.

### (2)Rethlim nadoi:- Nire mihei man mot na doi ka-e anti.

### (3)Tharantong:- Tha inhlei tuk inhlei madu tong ka-e anti.

### (4) Ramsathlim natong:-Ramsatha na sik a man mot natong ka-e anti.

### (5)Hmai ok doi:- Mi inkhat ahmai mandong natong ka-e anti.

### (6)Savun vanga bum na:- Doi kathem inkhat in savun hi aman cham ma doi vang mi sunga adapek ka-e anti.

### (7)Thepui vanga kap na doi:- Mi Doi kathem hen thepui hi ahmit anta syem ma antandoi pui mi kha anta kap ka-e. kha va jar-ra the hmit kanei anti ka-e anti.

### (8) Kheng suumdoi:-Thempi inkhat in Markhing toi vang ralei khur sunga sak thei ada a mi rathla aka khosi kha ka-e anti.

### (9) Thei khum doi:- Thempu inkhat in mi inkhat asam mo, apon hmo alo-a kache thei amaher sia, aman nat kha thei khumdoi ka-e anti.

### **Nuhngak rather indu thei na jordei ai Doitong:-**

### (1)Jordei ai:-Rether inkhat in anlungset thei mak nuhngak in arangei her nasik a atlo kha jordei ai anti.

(2)**Ningdei Ai**:- Nuhngak inkhat in rether anlungset her mak in arangei nasik a atlo kha ning dei ai anti.

(3) **Ning mak ai**:-Alungset her lom nu lompa manthen nasik a antlo kha ning makai anti.

(4)**Lungmok ai**:-Tu mo khat in athang set jar-ra mi inkhat ama lung asur pek kha lungmok ai anti.

### Mithlimna- Rethlim na Doitong

(1)**Mithlim nadoitong**:- Mi inkhat kho manhret lo-a dana,khan ni re mi hei man mot na khan chu Ram sahem manmot na kha thlim na doi tong anti.

(2)**Rechaam Doi**:- Doi katham inkhat in are mi hei leh an inhmu tak leh aman chaam her hei ja anratha man omlo kha recham doi inti ka-e anti.

### Rathla Bekna Doi Tong

(1)**Sarathla bek na**:-

Sahing jatha nasik a thempuhen sa rathla anbek ti chu an om naram ma satam na hmun hei ja khan sara thla anbek ka-e anti.

(2)**Shang rathla bek na doi**:- Shang haona sik a, shang rathla anbek “Shangsom shangre, jeibuk jeire sanuhngak sarether, hmavei jahma changa”, tia aban banna anhri-a, achaina “Tui tanat rea Aivompa shangron shang rathla hong roh”, anti ka-e anti.

### **(3)Mirathla bek na doi:-**

‘Hmuntin na kalon vaichap manmasi mihring hei’ rathla kham thempu hen anbek hinga hin anti, “Inn kalum ram kadai hong jo roh” anti ri ka-e anti.

### **(6)Hmit Fe Doi:-**

(1)**Ai hmit zing:-** Aihmit jing tong ka choi hei kha tuten hmu thei mak hei anti.

### **(2)Hmei phum hlung leh (silai ru) fe natong:-**

Hmeiphum hlung (silairu) khan chu the leh chem, min ama suk mak nasik a akafethei Doi katham,thempu um ka-om hei ka-e anti.

## **7.Thlasan Doitong:**

(1)Rahming pho sik, haole hao mak sik, Dam le Dam mak sik hi arkevang thla ansan hrat anti.

(2)Akadik le akadik mak hi artui vang thla an san hrat anti.

(3)Nai kanei sik hei nuhmei le pase sik manhret na sik a ummpui har vang thla ansan ri anti.

(4) Retor le tor mak sik aai vang thla ansan anti.

(5) Akana mi kha haita sur mo ti jong sot na sik ahrahmang vang thla an san anti.

## **8.Vok hlimna doi:-**

### **1.The le Sai vok hlim nadoi:-**

Inn shunga nuhmei jin nai anei mo, akathi akahring aka-om, in se innak aka-om mo? khanchu jor- lei kachoi aka om mo? Hing seng kar-ra hin inkhat pen pen aom jon chu inn le hlei the le sai sumle dar khan chu innshung mi nuhmei pase akhenga ar inkhat vang vok hlim sik ka-e anti.

## **2.Ramle tui vok hlim sik:-**

Niram sunga khan shar-ra kathi aka-om mo, Humpui jin se athat aka-om mo the le chem a mi inton aka-om mo, hri se rai se aka-om mo,tui rahnak a akalen mo?khan chu marnim min ralei akei mo? hi hei hi aom jonchu ramsung kha kum atlung pha leh vok inkhat vang vok hlim sik ka-e anti.

## **9.Phit na doi tong:-**

(1) Nuhngak Rether Shanghram ka chang hei phitna:

Nuhngak Rether shanghram an chang sik jon chu thempu pan aphithei; Arhme vang patjang aman-or hei anti.

(2) **Salu phit na:-**

(3)Sakatha aom jonchu Thempu pan salu kha ju hai vang aphit sik ka-e anti.

(4)**Ponther phitna:-**

Nuhmei inkhat in pasepon, nuhmei pon akhong inchu, akhong solim leh thempu inkhat in ju vang aphit sik ka-e anti.

## **KAKOM HEI DOI TONG HMANGCHAK HEI:**

1. Doi umm- Doitong rakip khum na.

2. Doi Hla- Doi tonga Hla in sak.

3. Vai phit thei -ashunga ju antada na, doi man cham na antahmang.

4. Doibu-Doi kachoi rok ta sak thei.

**Doithoi na (Hrithoi) na anta hmang ran hei:-**

1.Ar. 2.Vok. 3.Ke 4.Ui. 5.Sehrat 6.Setak. 7.Seloi 8.Artok 9.Pherva.  
10.Artui

**Doithoi na (Hrithoi) na antahmang thingbo hei:-**

1.AAi 2.Thiing 3. innthek 4. Sheertlan Thingbo. 5. Markhingthing 6.  
Ropui. 7. Kahrething 8.Kashething 9. Khonghmathing 10.Feivei 11.  
Vajubo 12. Daikhambo. 13.Hleithorbo. 14. Malongbo.15. Hmunther  
bo 16. Nakthlambo.17.Belangbo 18.Ramshang 19. Mandi 20. Airu.  
21. Aithang 22. Samtok. 23. Ngaru 24.Patsen. 25. Patdum 26. Khoipui  
turdon 27.Pasento 28.Chempong 29.Kashei 30. Uilu 31. Vok makha  
32.Seraki 33.Serja raki 34.Khoihnath 35.Matlak 36. Langber 37.  
Patrajang 38. Thelesai 39. Jamdi 40. Shang sai 41.Ai eng 42.Hmei ra ea  
kathi sa. 43.Hnachangbo.44.Tui 45.Reipar hei ka-e anti.

Nuhngak leh Rether shanghram sik hei kha tui in sha inti Thempu pan pat jang aman or sik hei.Pasepa, Rether pa inn ka sakunga khan intep natui or ju aman in sik hei anti.

Doi ju inh, kathi mathlana, jor mashona, sathatheina, sa AAi choi na ti hei hi thempu tontlona kae;alak alak anik anoi um katam her.

Hri thoinah, Doitong athem jonchu,thempu leh thempi heite ankar na omak. Nuhmei acheeng inchu,Thempi inti, pase achang inchu Thempu inti ka-e anti.Thempu hei tahmang tong rahme tichu hei Doi hei doi aenum aphut na antahmang heikha athoi jahi ka-e:-



Hmatak vaiphit theiju inthon kha amatu sik, khan ju athur sik a kha ahri pen kha chu .He **hem phut hiva tong** rahme inthum mahin anta phut ka-e in ti. Achai napen na inkao natong vang ankauva achai sik ka-e anti.

Sun so pet sik nitin chu Page 50/60 nek a katam sik hi seng hi abong nathei chen na ka hong sun ka-e. Doitong hiseng hin nipu nipa hei antalei manvet jo hei ka-e. Tunchu Pathen nin ajong sot jo me.Avea doi le ai ja invet nok mak jo rih. Pathen lungset na nichen vang hin khat khat lungset, lum inlo to-et mesonnah, ni Pathen kalur chungnung tong pek jui pummah hringkho hlam hro et rih.Amen.

## Tuning katlung nitong (kom) tonga lairik kasin te-tek Kaphong athoi ja hei ka-e.

- |    |                                    |                                      |
|----|------------------------------------|--------------------------------------|
| 1  | <b>Hmathlir</b>                    | <b>Hlather magazine</b>              |
| 2  | <b>Lungdaizen</b>                  | <b>Pi.Shongnei hringkho thuhming</b> |
| 3  | <b>Setretuk napengkun</b>          | <b>21 Century Ichum Keirap Kom</b>   |
| 4  | <b>Shem leh shok Part-I</b>        | <b>kho Berkap hma inkei pen</b>      |
| 5  | <b>Shem leh shok Part-II</b>       | <b>Hnungthlir</b>                    |
| 6  | <b>Kei chi kei o</b>               | <b>Kom hei inthoi na doibom.</b>     |
| 7  | <b>Ten lai</b>                     |                                      |
| 8  | <b>Tong invek leh tong intlun.</b> |                                      |
| 9  | <b>Naipang hei mathokna</b>        |                                      |
| 10 | <b>Sursot(Angka)Rabu</b>           |                                      |
| 11 | <b>Hmongkotjang Rethlir</b>        |                                      |

*m.s.kom*

**(M.Sherkhopao Kom)**  
Ichum Keirap Village